

Nos sogns e nos defuncts

Numnasontga, igl emprem da november, ei la fiasta internaziunala en honor dalla gronda raspada da tut ils sogns. Quei fatg lai s'imaginar che la sontgadat ei era en nies temps in scazi desiderabel.

Il scazi da numnasontga renda nus conscients da quei, cu nus patertgein vid tut ils gronds sogns enconuschents, denton era vid quels meins enconuschents. Atgnamein oravontut vid quels, ch'ei mai vegni proclamai sco sogns, e che figureschan negliu el calendari cun in di commemorativ. Denter quels sogns sperein da dumbrar nos confamigliars, nos amitgs ed enconuschents; tut quels che vivan ella gloria da Diu.

Ils 2 da november seregurdein nus oravontut dallas olmas. Dad olmas dils trapassai che sepreparan per la veta perpetna. A quellas olmas savein nus gidar entras nossas oraziuns.

Duront il meins da november, ils meins che nus patertgein vid nos morts, scaffin nus ina solidaritad denter quels dus munds. Duront che nus urein per nos defuncts, ils quals ein aunc buca liberai, san las olmas liberadas esser intercessuras tier Diu per nus carstgauns cheu sin tiara.

Entras nies sestentar da s'avischnar e viver tenor ils exempels da numerus sogns, ston nos vegnentsuenter ed ils survivents buca rugar ton per nies spindrament. Leutier porscha igl ABC da cardinal Stefan Wyszynski entgins buns patratgs ed era in agid.

Jeu giavischel a Vus tuts ina buna reussida ed in meditatif meins da november.

Vies Sur Peter

Igl ABC dil moviment per la carezia

1. Stema mintga carstgaun, perquei che Cristus viva en el. Seigies aviarts per Tiu concarstgaun ch'ei tiu frar, tia sora.

2. Patratga positiv da tuts – e negativ da negin. Sesprova d'anflar il bien malgrad la schliatadad.

3. Discuora adina beinvulent da tiu proxim – plaida mai dil mal sur dad el. Fai bien, quei ch'ei capitau malgestamein entras plaid. Caschuna negina disharmonia denter carstgauns.

4. Plaida cun mintg'in buntadeivel. Aulza buca tia vusch. Buca smaladescha. Caschuna negin entiert. Sveglia negina cumpassiun faulsa. Sesprova da calmar e fai dil bien.

5. Perduna a tuts tut. Porta mai suenter enzatgei en tiu cor. Porscha tiu maun adina sco emprem.

6. Agescha per avantatg da tiu proxim. Va entuorn buntadeivel cun mintgin, gest aschia, sco ti giavischas ch'ins va entuorn cun tei. Patratga buca suenter tgei ch'enzatgi ei culpons a ti, mobein seregorda da quei che ti eis culpons ad enzatgi.

7. Pren part dalla tribulaziun dils auters. Camina bugen per segidar cun plaid encuraschonts, cun ovras e cun cor aviert.

8. Lavura recli, perquei dils fretgs da tia lavur profiteschan auters, gest aschia sco ti trais a nez dalla lavur da tes concarstgauns.

9. S'engascha per las ovras caritativas. Hagies in cor aviert per paupers e malsaus. Empresta bugen. Seigies premuraus da percepir ils basignus en tiu contuorn.

10. Roga per tuts, era per tes inimitgs.

Cardinal Stefan Wyszynski

Informaziuns per Laax e Falera

Communiun dils malsauns

a Laax: Mesjamna, ils 09-11-2011 suentermiezdi

a Falera: Venderdis, ils 04-11-2011 suentermiezdi
Gievgia, ils 17-11-2011 suentermiezdi

Uras d'aduraziun da Numnasontga a Laax

Nus recumandain a Vus las uras d'aduraziun.

14.00h - 15.00h Spenda, Geinas, Tului-su, Cons, Salums,
Murschetg

15.00h –16.00h Crest, Val, Tului-sut, via Larisch, via Selva,
via principala

16.00h –16.30h Davos Baselgia, via Streia, via Falera,
via Fau, via Fandrels, via Grava

16.30h Viaspras e reposiziun

Sentupada da geniturs e lur baptizands a Falera

Dumengia, ils 6 da november 2011 allas 14.30h ella Fermata.
Nus selegrein da passentar quei suentermiezdi cun affons e
geniturs.

Devoziun dallas mummas e lur affons

Ils 22 da november 2011 allas 16.00h ha liug en baselgia
parochiala Falera la devoziun che porscha il tema: «Il tschupi
d'Advent». Quels patratgs possien accumpignar las mummas e
lur affons cun biaras glischs duront il temps d'Advent

Devoziun d'Advent

Per quei temps grazius lein nus metter in punct particular
all'entschatta cun la devoziun d'Advent. Oravontut las famiglias
cun ils affons ein cordialmein envidai da prender part.

Messa per las commembras defunctas dall'Uniun da dunnas

Ella s. messa seregurdein nus en special da tuttas commembras
defunctas en engrazieivladad per tut il prestau duront lur veta en
favur da nossas famiglias e dalla cuminonza.